



UNIVERSITÄTS-
BIBLIOTHEK
PADERBORN

Universitätsbibliothek Paderborn

Eginhartvs De Vita Caroli Magni, Animadversionibvs Illvstratvs

Bessel, Friedrich
Reinhard, Johann Friedrich

Helmeftadii, 1667

Capvt II.

urn:nbn:de:hbz:466:1-10996

CAPVT II.

1. Quo officio * tùm cùm Hildericus deponeretur, Pipinus pater CAROLI regis jam velut hæreditario * jure fungebatur. † Nam Pater ejus CAROLUS, qui tyrannos per totam Franciam dominatum sibi vendicantes oppressit, & Saracenos Galliam occupare tentantes, duobus magnis præliis, uno in Aquitania apud Pictavium civitatem, altero juxta Narbonam apud Byrram fluvium ita devicit, ut in Hispaniam eos redire compelleret, eundem magistratum à Patre Pipino sibi dimissum egregiè administravit. † Qui honor non aliis à populo dari consueverat, quam iis, qui & claritate generis, & opum amplitudine cæteris eminebant. † Hunc cùm Pipinus pater CAROLI Regis, ab avo & patre sibi & Fratri Carolomanno relictum, summâ cum eo concordia divifum, aliquot annis velut sub rege memorato tenuisset, frater ejus Carolomannus, incertum quibus de causis, tamen videtur, quod amore conversationis contemplativæ succensus, operosâ temporalis regni administratione relicta, Romam se contulit, in otium: ibique habitu permutato monachus factus, in monte Soracte apud ecclesiam Beati Sylvestri constructo monasterio, cum fratribus secû ad hoc venientibus, per aliquot annos optatâ quiete perfruitur. † Sed cùm ex Franciâ multi nobilium ad vota solvenda Romam solenniter commearent, & eum velut dominum quondam suum præterire nollent, otium, quo maximè delectabatur, crebrâ salutatione interrumpentes, locum mutare compellunt. † Nam cum hujuscemodi frequentiam suo proposito officere vidisset, relicto monte, in Samnium provinciam ad monasterium S. Benedicti, situm * in arce Casina secessit, & ibi quod reliquum erat temporalis vitæ, religiosè conversando complevit.

* MS. taxium.

* In Scripro Cod. hæc vox de est.

* C. Flori in castro Casinum.

ANIM.